

**Convenio entre a Consellería do Medio Rural a través da Dirección Xeral de Planificación e Ordenación Forestal, a Axencia Galega de Calidade Alimentaria (AGACAL) e o Concello de Riós polo que se lle conceden subvencións autonómicas ao Concello, para a participación activa do Centro de Desenvolvemento Agroforestal de Riós no desenvolvemento dun Programa específico de identificación, restauración e promoción da xestión forestal activa e sustentable, durante os anos 2020 e 2021,**

Riós, 21 de xullo de 2020

### REUNIDOS

Por unha banda, José González Vázquez, conselleiro do Medio Rural, segundo o Decreto 99/2018, do 26 de setembro polo que se dispón o seu nomeamento, en nome e representación da Consellería do Medio Rural da Xunta de Galicia, actuando no exercicio do seu cargo e en función das atribucións que lle confiren o artigo 34.1 da Lei 1/1983, do 22 de febreiro, reguladora da Xunta e da súa presidencia, e o Decreto 88/2018, do 26 de setembro, polo que se establece a estrutura orgánica da Xunta de Galicia.

Doutra banda, Manuel Rodríguez Vázquez, director da Axencia Galega de Calidade Alimentaria (AGACAL), actuando en nome e representación de dita Axencia, segundo o Decreto 52/2018, do 5 de abril, polo que se crea a Axencia Galega de Calidade Alimentaria e se aproban os seus estatutos, que actúa por delegación do presidente da Axencia Galega de Calidade Alimentaria, de acordo coa Resolución do 24 de abril de 2013 de delegación de competencias da Presidencia na persoa titular da Dirección da Axencia Galega de Calidade Alimentaria, DOG nº 85 de 3 de maio de 2013.

Doutra banda, Francisco Amando Veiga Romero, alcalde do Concello de Riós, en virtude das facultades representativas que lle atribúe o artigo 61.1 da Lei 5/1997, do 22 de xullo, da administración local de Galicia.

Todas as partes actúan no exercicio dos seus respectivos cargos, coa representación legal que ostentan, e recoñécense mutuamente capacidade para se obrigaren nos termos do presente convenio,

### EXPOÑEN:

No mes de novembro do ano 2008 inaugurouse o Centro de Desenvolvemento Agroforestal de Riós. Este centro ten entre os seus obxectivos facer inventario e tipificación dos soutos da montaña ourensá para mellorar a súa xenética, investigar as

enfermidades do castaño e todas as pragas que o ataca, así como favorecer a constitución e xestión de asociacións forestais así como outras actividades en materia de xestión forestal sustentable.

A execución das instalacións deste centro foi financiada inicialmente con cargo a un proxecto realizado ao abeiro do programa INTERREG III cun investimento total de 2.530.000 euros repartidos do seguinte xeito: 75% fondos da Unión Europea; 15% do Instituto Ourenán de Desenvolvemento Económico (Inorde); o 5% aportado pola Consellería do Medio Rural e o 5% restante a cargo dos concellos de Riós, A Gudiña, A Mezquita, Vilariño de Conso e Vilardevós.

Posteriormente, o 29 de novembro de 2017 a Consellería do Medio Rural e o Concello de Riós asinaron un primeiro convenio para a participación activa do Centro de Desenvolvemento Agroforestal de Riós no desenvolvemento dun Programa específico de promoción do cultivo e produción da castaña durante os anos 2017, 2018 e 2019. De acordo co convenio, a entón Dirección Xeral de Ordenación Forestal financiou as accións previstas durante ese período cun investimento total de 165.951,67 €.

O centro está situado nunha área de montaña no que ten especial interese o cultivo do castiñeiro, que forma na actualidade ecosistemas dun gran interese nos que se acumula un valor produtivo que aporta rendas periódicas ás poboacións locais.

A identificación, restauración e promoción da xestión activa destes soutos, require dun especial apoio técnico aos titulares das explotacións, tanto nos aspectos produtivos como de ecoloxía, pragas e doenzas que teñen un complicado manexo e que convén ter vixiadas realizando un seguimento intensivo.

En todas estas tarefas o centro resultará de gran axuda para os titulares dos soutos de castiñeiros.

É por estas razóns polas que o Centro ten previsto levar a cabo nos próximos anos un Programa específico de identificación, restauración e promoción da xestión activa dos soutos tradicionais de castiñeiros, con especial fincapé na promoción de agrupacións de propietarios para a xestión conxunta sobre figuras de base asociativa, civil ou mercantil e na loita contra as doenzas do castiñeiro.

Pola súa parte, de acordo co artigo 15.1 do Decreto 149/2018, do 5 de decembro, polo que se establece a estrutura orgánica da Consellería do Medio Rural e se modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, á Consellería do


Medio Rural, a través da Dirección Xeral de Planificación e Ordenación Forestal, correspóndelle, dentro das súas competencias:

- Apoiar a xestión forestal sustentable e a silvicultura, para garantir a obtención das diferentes producións forestais en cantidade e calidade, co fin de fornecer a importancia da contribución do sector forestal galego á bioeconomía e á xeración de emprego sustentable, dun xeito especial, no medio rural.
- Velar polo coñecemento do medio forestal, baseado nunha información estatística actualizada, e promover a divulgación da cultura forestal.
- Desenvolver, dentro das súas competencias, as medidas que se consideren oportunas para garantir a protección dos bosques das ameazas bióticas e abióticas, empregando métodos de loita integrada contra as pragas e enfermidades e impulsar a silvicultura como ferramenta básica preventiva para mellora do estado fitosanitario das masas forestais.
- Promover accións cara a un marco social cooperante coa xestión forestal sustentable que implique o recoñecemento da importancia do traballo dos propietarios e xestores forestais e a súa achega á conservación dos ecosistemas forestais.

Así mesmo, segundo o artigo 1.2 do anexo do Decreto 52/2018, do 5 de abril, polo que se crea a Axencia Galega da Calidade Alimentaria (AGACAL) e apróbanse os seus estatutos, a axencia está adscrita á consellería da Xunta de Galicia competente en materia de agricultura; ten personalidade xurídica propia, patrimonio e tesouraría propios e autonomía na súa xestión nos termos establecidos polos seus estatutos e pola demais normativa vixente de aplicación.

O artigo 2 do mesmo anexo establece que o obxecto do AGACAL é, entre outros, desenvolver as actividades de I+D+i nos sectores agrario, gandeiro e forestal, dentro do marco das competencias que a esta axencia lle atribúen os estatutos.

Dentro das funcións do AGACAL en materia de formación, enumeradas no artigo 11 do anexo referido, atópase a de programar a formación agraria, nos seus aspectos de ensinanzas regradas e non regradas, tanto das persoas agricultoras, gandeiras e silvicultoras como das súas asociacións e agrupacións, así como daquelas persoas que queiran acceder no futuro á titularidade ou xerencia de calquera explotación agraria ou forestal.



A Consellería do Medio Rural é consciente da necesidade de desenvolver o sector primario sobre todo en zonas cun enorme potencial forestal e agrícola, cunhas novas oportunidades de creación de emprego e rendas a través da xestión activa dos soutos de castiñeiros. Sobre todo en zonas como esta desfavorecida, de alta montaña, cunha poboación envellecida, onde calquera axuda ou apoio para o desenvolvemento das potencialidades da zona é absolutamente prioritaria e de gran interese ecolóxico, social e económico. Por estas razóns a achega económica desta Consellería ao abeiro do presente convenio ten un carácter de interese público e económico que, xunto a que o Centro de Desenvolvemento Agroforestal de Riós é un centro único na zona dedicada á finalidade deste convenio, considéranse razóns suficientes que xustifican a falta de concorrencia.


O presente convenio estará sometido á normativa autonómica en materia de subvencións, en especial aos artigos 19.4 e 26 da Lei 9/2007, do 13 de xuño, de Subvencións de Galicia, e aos artigos 36 a 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.



Así mesmo, cumprírase co previsto no artigo 48.7 da Lei 40/2015, do 1 de outubro, de réxime xurídico do sector público.

E en base ao exposto acordan a sinatura do convenio de acordo coas seguintes cláusulas:

#### **Primeira.- Natureza**



O presente convenio ten natureza administrativa e rexeráse polas súas propias cláusulas. En todo o non sinalado estarase ao previsto na normativa autonómica en materia de subvencións, en especial aos artigos 19.4 e 26 da Lei 9/2007, do 13 de xuño, de Subvencións de Galicia, e aos artigos 36 a 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

Así mesmo, cumprírase co previsto no artigo 48.7 da Lei 40/2015, do 1 de outubro, de réxime xurídico do sector público.

#### **Segunda.- Obxecto**

Este convenio ten por obxecto instrumentar unha subvención directa ao Concello de Riós para participar, xunto coa Consellería do Medio Rural a través da Dirección Xeral de Planificación e Ordenación Forestal e a Axencia Galega de Calidade Alimentaria (AGACAL) nun Programa específico de identificación, restauración e promoción da

xestión activa dos soutos tradicionais de castiñeiros e de frondosas autóctonas, con especial fincapé na promoción de agrupacións de propietarios para a xestión conxunta sobre figuras de base asociativa, civil ou mercantil, e na loita contra as doenzas do castiñeiro e as frondosas autóctonas, a través da participación activa do Centro de Desenvolvemento Forestal de Riós.

### Terceira.- Programación de actuacións a desenvolver

As actuacións do programa ao que se refire a cláusula anterior que serán financiadas con cargo a este convenio son as seguintes:

- A. Identificación de soutos tradicionais nas provincias de Lugo e Ourense, así como de frondosas autóctonas de especial interese tanto para a produción como para a conservación dos recursos xenéticos forestais.

Identificaranse e cartografaranse os soutos tradicionais, tanto produtores como en situación de abandono, de superficie igual ou superior a 5 hectáreas nas provincias de Lugo e Ourense. A información, recollida en formato dixital, incorporarase a un SIX para dispor dunha información actualizada sobre as masas tradicionais de castiñeiro máis importantes en Galicia.

No caso de frondosas autóctonas de especial interese, a superficie mínima de identificación e cartografía fixarase en función de cada especie.

No caso de ter unha superficie maior de 15 hectáreas, fomentarase a inclusión do soto ou a masa de frondosa autóctona de interese no Rexistro de masas consolidadas de frondosas autóctonas, axudando a completar toda a documentación e compromisos necesarios para a súa inclusión no rexistro, incluído os trámites de audiencia e por tanto de difusión no proceso de inscrición.

- B. Vixilancia e loita contra as doenzas do castiñeiro e de masas de frondosas autóctonas de especial interese

A vitalidade dos soutos e a súa capacidade produtiva require dun bo estado fitosanitario. O Centro Agroforestal de Riós está a levar a cabo accións de loita contra as pragas e doenzas, coherentes e en liña coa actuación levada a cabo neste eido pola Dirección Xeral de Planificación e Ordenación Forestal.

No caso da enfermidade do cancro do castiñeiro, o Centro porase en contacto con cooperativas e asociacións de produtores de castaña das provincias de Lugo e

Ourense, co fin de localizar cepas da enfermidade que aínda non estean a responder ao tratamento experimental que está a levar a cabo a Consellería do Medio Rural.

Con respecto as actuacións de loita biolóxica, en especial coas cepas hipovirulentas e co parasitoide *Torymus sinensis* que de maneira experimental realiza a Consellería do Medio Rural, o centro colaborará coa localización e o seguimento das actuacións de fincas que poidan participar na dispersión dos axentes da loita biolóxica.

O Centro recibirá avisos de posible danos conforme aos formularios e protocolos administrativos establecidos, procederá á súa transmisión á autoridade sanitaria, e contribuirá así mesmo a divulgar e dar publicidade ás actuacións realizadas en colaboración coa Consellería de Medio Rural. En concreto, con respecto á praga da avésa do castiñeiro (*Dryocosmus kuriphilus*), o Centro coordinarase con cooperativas e asociacións de produtores das provincias de Lugo e Ourense, co fin de divulgar e dar publicidade ás soltas demostrativas que está a realizar a Consellería do Medio Rural do parasitoide *Torymus sinensis*.

En canto a traballos da sanidade de frondosas autóctonas, será un centro de recepción de avisos de pragas e doenzas, dando traslado da información recibida á Consellería do Medio Rural, quen poderá solicitar ao centro a remisión de mostras para a súa análise.

Así mesmo, realizará as comprobacións en campo que se lle soliciten en referencia a pragas e doenzas de frondosas autóctonas e soutos de castiñeiros.

### C. Realización de accións formativas

Unha das claves para o éxito nunha actividade agroforestal estriba nun axeitado grao de coñecemento sobre as particularidades da produción que se pretenda. Neste senso, tanto en novas explotacións coma no caso de desempregados doutros sectores que pretendan unha incorporación ao mercado laboral no sector primario, ben por conta allea, ben coma emprendedores, é de vital importancia a posibilidade de acceso a unha formación axeitada.

O Centro de Desenvolvemento Agroforestal de Riós desenvolverá esta función realizando cursos e xornadas de formación que estarán dirixidas especialmente a tres colectivos:

- Produtores en activo.
- Persoas que pretendan iniciar unha actividade agraria.



- Desempregados na busca dunha incorporación ao mercado laboral por conta allea en empresas do sector primario.

Estas accións formativas terán un carácter eminentemente práctico e serán impartidas polo persoal técnico do centro, tanto no propio centro como en concellos de Galicia que as poidan demandar. Ademais, periodicamente realizaranse xornadas sobre temas de especial interese coa participación de expertos na materia.

Non se financiará ningún curso que remate con menos de 15 alumnos e un alumno non poderá asistir ao mesmo curso máis dunha vez.

D. Apoio ao inventario forestal continuo de Galicia.

O apoio, mediante puntos ou parcelas de contraste que axuden a comprobar a composición específica mediante a súa visita *in situ*, poderá establecer o grao ou a porcentaxe de fiabilidade do sistema de identificación e clasificación dos estratos delimitados no Inventarios Forestal Continuo de Galicia (IFCG).

A forma de aumentar a fiabilidade na clasificación automática das formacións específicas mediante sensores remotos establecida en dito Inventario, a través dun logaritmo matemático, especialmente de masas de frondosas caducifolias como castiñeiros, soutos, touzas ou bidueiros, baséase na comprobación sobre o terreo do resultado que o dito logaritmo arroxa. Deste xeito, a Consellería do Medio Rural establecerá unha relación de puntos de contraste a través das súas coordenadas (X,Y) para que sexan visitadas *in situ* e identificada a formación específica mediante protocolo establecido ao efecto.

**Cuarta.- Obrigas das partes**

- A. Co fin de garantir a execución do obxecto do presente convenio, o Concello de Riós obrígase a:
- Presentar cada ano, antes do 31 de xaneiro, unha memoria de programación de obxectivos específicos e actuacións a realizar, que será aprobada mediante resolución conxunta do titular da Dirección Xeral de Planificación e Ordenación Forestal e do director da Axencia Galega de Calidade Alimentaria (AGACAL). No ano 2020 presentará dita memoria no prazo dun mes desde a data de sinatura do convenio.

- Levar a cabo, directamente ou en colaboración con outras entidades, as actuacións establecidas neste convenio debendo proceder, en consecuencia, á asignación dos medios humanos e materiais que sexan necesarios e, de ser o caso, á contratación das colaboracións externas que se precisen para o seu desenvolvemento.
- Presentar a documentación xustificativa da realización das actividades e o cumprimento da finalidade que determinen a concesión da subvención.
- Ser titular e suxeito pasivo de todas as obrigas tributarias e sociais e de calquera outra índole que se deriven da aplicación do ordenamento xurídico vixente.
- Facer figurar expresamente o financiamento da Consellería do Medio Rural como promotora do proxecto na totalidade das actuacións asociadas a este Convenio.
- Cumprir co deber de remisión ao Consello de Contas das contas xerais de cada exercicio.
- Facilitar a inspección e control da Consellería do Medio Rural co obxecto de supervisar o cumprimento das actividades previstas no convenio e que permitan a esta a xustificación financeira perante a Intervención Xeral da Comunidade Autónoma e o Tribunal de Contas, así como as comprobacións previstas na lexislación do Consello de Contas.

Doutra banda, o Concello, previamente á sinatura do presente convenio, presentará:

- Declaración responsable de non estar incurso en ningunha das prohibicións para a obtención de subvencións contempladas no artigo 10 da Lei 9/2007, de 13 de xuño, de subvencións de Galicia.
- Declaración xurada na que conste o compromiso de cumprimento das obrigas contempladas no artigo 11 da Lei 9/2007, do 13 de xuño, de subvencións de Galicia, sen prexuízo do disposto no Artigo 31.7 da Lei 9/2007, do 13 de xuño, de subvencións de Galicia.

Autorización á Consellería do Medio Rural para solicitar as certificacións emitidas pola Axencia Estatal da Administración Tributaria, a Tesouraría Xeral da Seguridade Social e a Axencia Tributaria de Galicia, que acreditan que a entidade se atopa ao corrente das súas obrigas. A dita autorización estará en vigor durante a vixencia do presente convenio.

B. A Consellería de Medio a través da Dirección Xeral de Planificación e Ordenación forestal e da Axencia Galega de Calidade Alimentaria (AGACAL) obríganse ao pagamento da subvención establecida neste convenio, no importe que a cada unha lle corresponde en función das súas competencias.

A tal efecto a Dirección Xeral de Planificación e Ordenación Forestal subvencionará as actuacións contidas nos apartados A, B e D da cláusula terceira deste convenio e AGACAL subvencionará as actuacións establecidas no apartado C da súa cláusula terceira.

#### **Quinta.- Gastos subvencionables**

Os gastos obxecto de subvención son aqueles detallados no anexo I.

Con carácter xeral, e de acordo co establecido no artigo 29 da Lei 9/2007, do 13 de xuño, de subvencións de Galicia, consideraranse gastos subvencionables aqueles que, de xeito indubidable, respondan á natureza da actividade subvencionada.

O importe do IVE non se considerará gasto subvencionable cando sexa susceptible de recuperación ou compensación, salvo que se acredite a exención do mesmo e consecuentemente non resulte recuperable para o beneficiario.

O Concello de Riós poderá concertar con terceiros a execución total das actuacións obxecto deste convenio. Os contratistas quedarán obrigados soamente ante o Concello, que asumirá toda a responsabilidade da execución da actividade subvencionada.

En ningún caso o custo de adquisición dos gastos subvencionables poderá ser superior ao valor do mercado.

Considérase gasto realizado cando se teña contabilizado o recoñecemento da obriga polo órgano competente da entidade local. O concello estará obrigado a acreditar documentalmente a efectividade dos pagos realizados no prazo máximo de sesenta días naturais contados a partir da data de ingreso na conta bancaria dos beneficiarios/as de cada un dos abonos.

Nos pagos anticipados aos que se refire a cláusula oitava considérase gasto realizado o que foi efectivamente pagado pola entidade local beneficiaria con anterioridade á finalización do período de xustificación.

**Sexta.- Dirección, medios humanos e materiais**

1. Todo o persoal que participe ao abeiro deste convenio, desenvolvendo as accións descritas, dependerá tanto xurídica como organicamente da entidade local e, en ningún caso, terá vínculo laboral coa Xunta de Galicia. Polo tanto, a entidade local asumirá o pagamento dos salarios, a concesión de permisos, licencias, vacacións e, no seu caso, substitucións; imposición, cando proceda, de sancións disciplinarias e cantos efectos de Seguridade Social se deriven, en particular o abono de cotizacións e o pagamento de prestacións e cantos outros dereitos e obrigas se deriven da relación contractual entre empregado e empregador.
2. A entidade local deberá cumprir coa normativa vixente de prevención de riscos laborais para a realización dos traballos aos que se refire o presente convenio, asumindo as responsabilidades derivadas do incumprimento das súas cláusulas.

**Sétima.- Orzamento e obrigas da Consellería de Medio Rural e da Axencia Galega de Calidade Alimentaria (AGACAL)**

A Consellería do Medio Rural, a través da Dirección Xeral de Planificación e Ordenación Forestal e a da Axencia Galega de Calidade Alimentaria (AGACAL) financiarán as accións do presente convenio, dentro das partidas orzamentarias 14.03.713B 760.0 (Consellería) e 14.A2.713D 760.0 (AGACAL) dos orzamentos xerais da Comunidade Autónoma de Galicia, códigos de proxecto 2016 00208 e 2011 00765 respectivamente, durante os seguintes exercicios orzamentarios e cos seguintes importes máximos:

ANO	Aplicación	PROXECTO	IMPORTE
2020	14.03.713B 760.0	2016 00208	50.000,00 €
	14.A2.713D 760.0	2011 00765	2.000,00 €
2021	14.03.713B 760.0	2016 00208	35.000,00 €
	14.A2.713D 760.0	2011 00765	48.000,00 €
<b>TOTAL</b>			<b>135.000,00 €</b>

O financiamento por parte da Consellería e da AGACAL das actuacións obxecto do presente convenio será compatible con outras axudas establecidas por outra Administración Pública, organismo ou ente público ou privado, nacional ou internacional para o mesmo fin.

O importe das axudas en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custe da actividade subvencionada.

As actuacións desagregadas, a modo de cronograma, entre as diferentes anualidades preséntase no Anexo I.

### Oitava.- Xustificación

O Concello de Riós estará obrigado a xustificar ante a Consellería do Medio Rural e a AGACAL o cumprimento da finalidade da subvención, a realización da actividade ou adopción do comportamento que fundamentou a súa concesión e o seu custo real, mediante a presentación dunha conta xustificativa integrada, con carácter xeral, pola seguinte documentación:

- Certificación expedida pola Secretaría da entidade local, co visto e prace do/a alcalde/sa ou presidente/a, relativa á aprobación polo órgano competente da conta xustificativa da subvención en que se faga constar, como mínimo, de forma detallada:

1º O cumprimento da finalidade da subvención. Presentar, antes do 15 de decembro de cada ano, un informe coas actuacións realizadas e os obxectivos acadados, os gastos xerados, as facturas contabilizadas e, de existir, xustificacións dos pagamentos realizados ao persoal asignado ás actuacións descritas no clausulado do convenio.

2º Os distintos conceptos e contías correspondentes aos gastos totais soportados pola entidade beneficiaria imputables á actuación subvencionada coa seguinte relación: identificación do/a acredor/a, número de factura ou documento equivalente, importe, data de emisión e data de recoñecemento da obriga polo órgano competente.

- Os documentos acreditativos dos gastos realizados con medios ou recursos propios e a indicación, de ser o caso, dos criterios de repartición dos custos xerais e/ou indirectos incorporados na relación a que se fai referencia no punto anterior.
- Unha relación detallada doutros ingresos ou subvencións que financiasen a actividade subvencionada con indicación do importe e a súa procedencia.
- De ser o caso, os tres orzamentos que se esixen en aplicación do artigo 29.3.º da Lei 9/2007, do 13 de xuño, de subvencións de Galicia.
- Certificación da Intervención ou do órgano que teña atribuídas as facultades de control da toma de razón en contabilidade e do cumprimento da finalidade para a cal foi concedida, de acordo co artigo 8 do Decreto 193/2011, do 6 de outubro, polo que se regulan especialidades nas subvencións ás entidades locais galegas.

**Novena.- Pagamento**

O convenio subvencionarase co cargo as partida orzamentarias 14 03 713B 760.0, código de proxecto 2016 00208, da Consellería de Medio Rural por un importe total de 85.000 € para os anos 2020 e 2021 e con cargo á aplicación orzamentaria 14.A2.713D 760.0 de AGACAL, código de proxecto e 2011 00765, por un importe total de 50.000 euros para os anos 2020 e 2021. A distribución dos importes por anualidades e aplicacións orzamentarias é a seguinte :

ENTIDADE	APLICACIÓN ORZAMENTARIA	IMPORTE 2020	IMPORTE 2021	TOTAL
Consellería	14.03.713B.760.0	50.000,00	35.000,00	<b>85.000,00</b>
Agacal	14.A2.713D 760.0	2.000,00	48.000,00	<b>50.000,00</b>
<b>TOTAL</b>		<b>52.000,00</b>	<b>83.000,00</b>	<b>135.000,00</b>

Nas dúas anualidades realizaranse dous pagamentos por parte da cada unha das dúas entidades. O primeiro será un anticipo do 70% da anualidade de acordo ao establecido no artigo 63.4 do Decreto 11/2009, do 8 de xaneiro e unha vez aprobado o programación anual de actividades presentada polo concello.

Os pagamentos destes anticipos xustificanse porque resultan indispensables para asumir os gastos en materiais e de persoal necesarios para iniciar os traballos a realizar con cargo a este convenio.

O segundo pagamento, do outro 30% da anualidade, levarase a cabo unha vez que o Concello presente, antes do 15 de decembro de cada ano, o informe anual de actividades e xustificación dos gastos, que deberán ser certificados pola Dirección Xeral de Planificación e Ordenación Forestal e pola Axencia Galega de Calidade Alimentaria (AGACAL).

**Décima.- Modificación da concesión**

1. Toda alteración das condicións tidas en conta para a concesión desta subvención e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación do convenio polo que se regula a presente subvención.

2. Cando por circunstancias técnicas sexa imprescindible variar o contido específico dos investimentos ou dos prazos recollidos no presente convenio, a persoa titular da Consellería do Medio Rural poderá acordar a modificación do convenio a instancia do beneficiario sempre que se cumpran os seguintes requisitos:
- Que a actividade, conduta ou modificación do proxecto estea comprendida dentro do obxecto deste convenio.
  - Que se acredite a inexistencia de prexuízo a terceiros/as.
  - Que os novos elementos e as circunstancias que motiven a modificación, de teren concurrido na concesión inicial, non supuxesen a denegación da axuda ou subvención.
3. O beneficiario deberá solicitar esta modificación mediante instancia dirixida á persoa titular da Consellería do Medio Rural, xunto coa documentación acreditativa do cumprimento dos requisitos reflectidos no punto anterior. De non facelo, poderá implicar a perda da subvención afectada pola modificación e, no caso de que esta implique unha variación substancial do proxecto inicial, a perda total da subvención concedida.
4. O acto polo que se acorde ou se denegue a modificación da resolución será ditado pola persoa titular da Consellería do Medio Rural, logo da instrución do correspondente expediente ao cal se lle dará audiencia ao interesado nos termos previstos na Lei 9/2007, do 13 de xuño, de subvencións de Galicia.

#### **Décimo primeira.- Minoración da subvención**

Procederá a minoración da subvención concedida cando as actuacións desenvolvidas e xustificadas ao abeiro do presente convenio teñan un custo inferior ao importe máximo establecido no anexo I, e sempre que esta minoración non supoña unha realización deficiente do proxecto. Producirase a perda do dereito ao cobramento parcial polo importe de minoración da subvención.

#### **Décimo segunda.- Reintegro**

Procederá o reintegro parcial ou total dos fondos percibidos no suposto de incumprimento das condicións establecidas para a súa concesión nos termos previstos no Título II da Lei 9/2007, do 13 de xuño, de subvencións de Galicia.

Así mesmo, ao abeiro do disposto no artigo 14.1.n) da Lei 9/2007, os criterios de gradacións dos posibles incumprimentos para determinar a cantidade a minorar serán os seguintes:

1. O incumprimento total dos fins para os que se concedeu a axuda, da realización dos gastos subvencionables, ou da obriga de xustificación, dará lugar á perda ao dereito ao cobro, ou no seu caso, ao reintegro da totalidade da axuda concedida.
2. Calquera outro incumprimento considerárase incumprimento parcial dos fins para os que se concedeu a axuda, da realización do investimento subvencionable ou da obrigación de xustificación e dará lugar á perda do dereito ao cobro ou, no seu caso, na porcentaxe correspondente ao investimento non efectuado ou non xustificada.
3. A realización de modificacións non autorizadas no orzamento subvencionable, suporá a perda do dereito ao cobro.

Terán a consideración de infraccións leves as establecidas no artigo 54 da Lei 9/2007, do 13 de xuño, de subvencións de Galicia, que poderá dar lugar ás sancións pecuniarias establecidas no artigo 59 da devandita Lei 9/2007.

As infraccións graves e moi graves en materia de subvencións, recollidas nos artigos 55 e 56 respectivamente da Lei 9/2007, poderán dar lugar ás sancións previstas no artigo 60 e 61 respectivamente.

#### **Décimo terceira.- Comisión de seguimento**

Co fin de velar pola execución do presente convenio, crearase unha Comisión de Seguimento composta por 6 persoas, dúas persoas por cada entidade que participa no presente convenio, nomeadamente:

- Axencia Galega de Calidade Alimentaria (AGACAL).
- Dirección Xeral de Planificación e Ordenación Forestal.
- Concello de Riós.

Estará presidida polo titular da Axencia Galega de Calidade Alimentaria (AGACAL) ou representante no que delegue. Son funcións desta comisión de seguimento:

- a. Velar polo cumprimento do convenio.

- b. Propoñer as medidas necesarias para garantir o exercicio coordinado das competencias de cada unha das partes.
- c. Propoñer a aprobación do programa de actuacións.

Esta comisión reunirse inmediatamente para a resolución de calquera incidencia relacionada co convenio e ademais realizará as funcións que lle atribúen as demais cláusulas deste convenio.

#### **Décimo cuarta.- Transparencia**

As partes asinantes deste convenio outorgan o seu consentimento para que os datos persoais e o resto das especificacións que constan no citado convenio sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, e en concordancia coa da Lei 19/2013, do 9 de decembro, de transparencia, acceso á información pública e bo goberno e o Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia.

En cumprimento do disposto no artigo 20 da Lei 38/2003, de 17 de novembro, xeral de subvencións, o texto do convenio e a información requirida no ordinal oitavo do devandito artigo será comunicado á Base de datos nacional de subvencións (BDNS).

#### **Décimo quinta.- Resolución**

O presente convenio resolverase por incumprimento total ou parcial dalgunha das cláusulas que o regulan ou polo transcurso do tempo estipulado sen que se realicen os investimentos.

Así mesmo, poderase resolver por denuncia unilateral de calquera das partes previa comunicación á outra parte cun mes de antelación.

#### **Décimo sexta.- Inexistencia de relación laboral**

A subscrición do presente convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a Consellería de Medio Rural.

**Décimo sétima.- Xurisdición competente**

De conformidade co disposto na Lei 29/1998, de 13 de xullo, a xurisdición contencioso-administrativa será competente para entender os litixios que puideran xurdir na interpretación e cumprimento do presente convenio, que non puideran ser resoltas polas partes.

**Décimo oitava.- Vixencia**

O presente convenio producirá efectos dende a súa sinatura e ata o 31 do decembro de 2021.

Os gastos imputables á execución deste convenio comezarán a computar dende a data da sinatura do presente convenio.

**Décimo novena.- Protección de datos de carácter persoal**

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), da Lei Orgánica 3/2018, do 5 de decembro, de Protección de Datos Persoais e garantía dos dereitos dixitais, do Real Decreto 1720/2007, do 21 de decembro, polo que se aproba o Regulamento de desenvolvemento da Lei Orgánica de Protección de Datos, e demais normativa vixente de aplicación en cada momento en materia de protección de datos.

E, en proba de conformidade, asínase o presente convenio, por triplicado, no lugar e data indicados no encabezamento.

O conselleiro do Medio Rural

José González Vázquez

O alcalde do Concello de Riós

Francisco Amando Veiga Romero

O director da Axencia Galega da Calidade Alimentaria  
(PD Resolución do 24 de abril de 2013,  
DOG número 85 de 3 de maio de 2013)

Manuel Rodríguez Vázquez

**Anexo I.- Actuacións obxecto de subvención e importes máximos de axuda**

Actuacións:

- A. Identificación de soutos tradicionais nas provincias de Lugo e Ourense, así como de frondosas autóctonas de especial interese tanto para a produción como para a conservación dos recursos xenéticos forestais.
- B. Vixilancia e loita contra as doenzas do castiñeiro e de masas de frondosas autóctonas de especial interese.
- C. Realización de accións formativas.
- D. Apoio ao inventario forestal continuo de Galicia.
- E. Boa gobernanza.

Actuacións	Unidades	Número	Importe unitario	Importe máximo
Identificación	Identificación e cartografado de masas	80	625€/identificación e cartografado	50.000 €
Vixilancia e loita	Localización/detección e seguimento das actuacións	50	300€/actuación	15.000 €
Accións formativas	Cursos de formación para produtores agrarios	35	1.428,57€/curso	50.000 €
Inventario	Puntos de contraste no terreo	100	50€/puntos	5.000 €
Boa gobernanza	MVMC regularizado ou agrupación constituída	25	600€/CMVMC ou agrupación constituída	15.000 €
<b>TOTAL</b>				<b>135.000</b>

A desagregación por anualidades sería a seguinte:

Actuacións	Unidades	2020	2021	Importe máximo
Identificación	Identificación e cartografado de masas	30.000	20.000	50.000 €
Vixilancia e loita	Localización/detección e seguimento das actuacións	10.000	5.000	15.000 €
Accións formativas	Cursos de formación para produtores agrarios	2.000	48.000	50.000 €
Inventario	Puntos de contraste no terreo	1.500	3.500	5.000 €
Boa gobernanza	MVMC regularizado ou agrupación constituída	8.500	6.500	15.000 €
<b>TOTAL</b>		<b>52.000 €</b>	<b>83.000 €</b>	<b>135.000</b>



